

意

林

附别下齋補刻宋本第六卷

冊二

卷一

卷二

卷三

卷四

卷五

意林卷三

鹽鐵論十卷

並是文學與大夫相難

善剋者不戰善戰者不師善師者不陣

工不出則物用乏商不出則寶貨絕

川原不能實漏卮山海不能贍溢欲

案溢欲今本鹽鐵論作溪壑道

藏本亦作豁壑

宅近市則家富富在術數不在力耕

善歌者使人續其聲善作者使人紹其功

孔子能方不能圓故飢于黎邱

茂林之下無豐草大塊之閒無美苗

行遠者假于車濟江海者因于舟成名者因于資

案原

書無此句歐冶能因國君銅鐵作金鑪大鐘而不能自作

壺鼎盤盂

香餌非不美龜龍聞而深藏鸞鳳見而高逝

玉屑滿篋不成其寶仲尼之門七十子去父母捐室
家貧荷而隨孔子不耕而學其亂愈滋猶玉屑滿篋
也若能安國利人寧須文辭者哉

有粟而不能食無益于飢覩賢而不能用無益于削
歌者不期于利聲而貴于中節論者不期于麗辭而
務在事實

公卿者四海之儀表神化之丹青也上有輔明主之
任下有隨聖化之治

諸生抱枯竹守空言不知趨舍之宜時世之變
林中多疾風富貴多諛言

古者君子思德小人思利今人堅額健舌或以致業
九層之臺傾公輸子不能正大朝一邪伊望不能復

吏道雜

案道藏本作壅

而不選富者以財買官垂青綬環銀

龜擅生殺之柄專萬民之命

乘堅驅良列騎成行者不知負擔步行之勞

中國與邊境猶支體與腹心也肌膚寒于外腹心疾于內內外之相勞非相爲助也以仁義阻之道德塞之賢人守之則莫能入也

秦法繁于秋荼網密于凝脂然而上下相遁奸宄並生廐焚孔子問人不問馬賤畜貴人也秦法盜馬者死盜牛者刑苛也

說苑二十卷

劉向

東風則靡而西西風則靡而東上之化下如風靡草禹見罪人下車而泣左右曰此人不恭故得罪君王何痛之禹曰堯民以堯爲心今百姓各以其心爲心

故痛之

齊景公出獵上山見虎下山見蛇問晏子曰此不祥耶晏子曰有賢而不知知而不用用而不任此不祥也山是虎之室澤是蛇穴何不祥也

晏子侍景公公朝寒請進煖食于寡人對曰嬰非廚養之臣社稷之臣

晉平公問師曠曰吾年七十欲學恐晚如何師曠曰日暮豈不炳燭耶臣聞少而好學者如日出之陽壯而好學者如日中之光老而好學者如炳燭之明豈不愈于暗行乎公曰善哉

曾子衣敝而耕魯君使人致其下邑不受曰吾聞受人者畏人與人者驕人安知君能不我驕我能不畏乎遂不受

夫仕者身歸于君祿歸于親

忠臣不仕二君貞女不更二夫

居無垣牆人莫之毀傷行無防衛人莫之暴害此君子之行也

楚莊王賜羣臣酒燭滅有引美人之衣者美人援絕其纓告王王曰賜人酒醉乃顯婦人之節吾不取也乃命左右勿上火凡與寡人飲者不絕纓者不盡歡也羣臣遍絕纓而後舉火後與晉戰引美人衣者五合以報莊王

陽虎得罪于衛北見趙簡子曰自今以後不復樹人矣堂下之人臣所樹者過半今反危臣矣簡子曰樹桃李者夏得休息樹蒺藜者秋得其刺今子所樹蒺藜也自今以後擇人而樹之

夫政者無迎而拒無望而許

臨財莫如廉臨官莫如平廉平之守莫能攻

國不務大務得民心佐不務多務得賢俊

齊王謂淳于髡曰先生論寡人何好對曰古者所好者四而王所好者三古者好馬王亦好馬古者好味王亦好味古者好色王亦好色古者好士而王獨不好士王曰國無士耳若有寡人亦好之對曰驊騮騏驥本無王求之豹象之胎本無王求之毛嬙西施本無王求之而不求士何也

楊回見趙簡子曰臣居鄉三逐事君五去聞君好士故來左右曰居鄉三逐是不容于衆也事君五去是不忠於上也簡子曰美女者醜婦之仇也盛德君子者亂世所疎也正直之行邪枉所憎也遂用之作相

周公誡伯禽曰爾無以魯驕人衣成則缺衽宮成則缺隅示不成也鬼神害滿也

國有五寒凍不與焉一曰政外二曰女厲三曰謀泄四曰不敬士而國敗五曰不能治內而務外也

官不與勢期而勢自至勢不與富期而富自至富不與貴期而貴自至貴不與驕期而驕自至驕不與罪期而罪自至

魯有恭士行年七十其恭益甚魯君問曰長年恭可以釋也對曰君子恭以成名小人恭以除刑一言不安尚有蹉跌一飯雖美尚有哽咽鴻飛于天矰者得之虎豹雖猛人食其肉譽人者少惡人者多得不恭乎

歲饑民疾疫不足患也大臣祿重而不極諫近臣畏

罪而不敢言此大患也

趙襄子謂子路曰吾嘗問孔子曰先生事七十君豈無明君耶孔子不對何謂賢也子路曰建天下之鳴鐘撞之以莛豈能發其聲乎

善夜居者不能早起盛于彼者衰于此長于左者短于右

一貴一賤交情乃見一死一生乃知交情

口者兵也出言不當反自傷

丹所藏者赤漆所藏者黑君子慎所藏也

飛鳥愛羽虎豹愛爪所以輔身也

積恩曰愛積愛曰仁積仁曰靈臺靈臺者積仁也神靈者天之本

晏子爲上卿妾不衣帛馬不食粟何以華國對曰德

以華國不聞以妾與馬

趙簡子乘敝車瘦馬衣殺羊之裘其宰曰車新則安

馬肥則疾狐裘則溫君宜改也案原書簡子曰君子

服善則益恭小人服善則益踞

子貢謂子石曰何不學詩子石曰父母求吾孝兄弟

求吾悌朋友求吾信何暇學哉子貢曰損吾詩學子

詩

新序三十卷

案隋唐志新序三十卷故崇文總目及宋

志止十卷今存馬氏所錄大略當有

闕佚舊本遂以連上不復標目誤

河平四年都水使者諫議大夫劉向上言案此蓋奏

文故馬氏錄以弁首而今失之

舊以曲彌高二節綴其下亦誤

曲彌高者和彌寡

水所以載舟亦能以覆舟

意

林卷二

五中華書局聚

楚邱先生年七十被裘見孟嘗君君曰先生老矣何以教寡人先生曰欲使追車趁馬逐鹿搏虎吾卽死矣何暇老耶若使決嫌疑定猶豫吾卽少也何老之有孟嘗乃有愧色

魏王欲築中天之臺曰敢有諫者死許綰負蓐操畚入曰聞王欲爲中天之臺願効力焉臣聞天去地一萬五千里今王因而半之應高七千五百基廣八千里盡王之地不足以成臺址王宜起兵伐諸侯盡有其地猶不足也又伐西夷乃足之矣須具材木人徒稱此然可作也魏王默然後乃罷築

有遺鄭相魚不受人曰子嗜魚何故不受對曰惟嗜魚故不受受魚失祿無以食魚不受魚得祿終身食魚

子奇年十六齊君使治阿旣而君悔之遣使追追者反曰子奇必能治阿共載皆白首也夫以老者之智以少者決之必能治阿矣子奇至阿鑄庫兵以作耕器出倉廩以賑貧窮阿縣大治魏聞童子治邑庫無兵倉無粟乃起兵擊之阿人父率子兄率弟以私兵戰遂敗魏師

法言十五卷

揚雄撰李軌宏範注

務學不如務求師師者人之模範晞顏之人亦顏之徒晞驥之馬亦驥之乘

詩人之賦麗以則辭人之賦麗以姪若孔氏之門而用賦則賈誼升堂相如入室矣

四重何謂四重言重則有法行重則有德貌重則有威好重則有觀四輕何謂四輕言輕則招憂行輕則

招辜貌輕則招辱好輕則招姪

刀不利筆不銛宜加砥削

天可度則覆物淺矣地可測則載物薄矣

說天者莫辯乎易說地者莫辯乎書說體者莫辯乎

禮說志者莫辯乎詩說理者莫辯乎春秋

柳下東國之逐臣夷齊西山之餓夫李仲元不屈其

志不辱其身不夷不惠可否之閒

仲尼之道猶四瀆經營中國終入大海

太玄經十卷

楊雄撰
虞翻注

鷺蹕于林獺入于泉

案鷺音焦舊作鷹萃誤
古今韻注曰蹕音翠

鴟鵂在林𠵽彼衆禽

案司馬光集注曰鴟鵂惡鳥𠵽
惡也鴟舊作鴟𠵽作笑並訛

淮南王安多華少實

案此下三節唯山川
二句見續首餘並無

齊桓晉文之霸如日繼月

孔子文足老君元足

案西漢尚無老君之稱疑非揚子本文或出虞注未可知也

山川藪澤萬物歸焉

君子得位則昌失位則良小人得位則橫失位則喪

新論十七卷

桓譚

三皇以道治五帝以德化三王由仁義五霸用權智
無令刑罰謂之皇有制令無刑罰謂之帝賞善誅惡
諸侯朝謂之王興兵衆約盟誓謂之霸王者往也言
其惠澤優游天下歸往也王道純粹其德如彼霸道
駁雜其功如此俱有天下而君萬民垂統子孫其實
一也

圖王不成亦可以霸

治國者輔佐之本其任用咸得大才大才乃主之股

肱羽翮也

明鏡龜策也章程斛斗也銓衡丈尺也

前世俊士立功垂名圖畫于殿閣宮省此乃國之大寶亦無價矣雖積和璧累夏璜囊隨侯篋夜光未足喻也

伊呂良平何世無之但人君不知羣臣勿用也賢有五品謹勅于家事順悌于倫黨鄉里之士也作健曉惠文史無害縣廷之士也信誠一作誠篤行廉平公理下務上者州郡之士也通經術名行高能達于從政寬和有固守去公輔之士也才高卓絕竦峙一作疎殊于衆多籌大略能圖世建功者天下之士也

賈誼不左遷夫志則文彩不發淮南不貴盛富饒則不能廣聘駿士使著文作書太史公不典掌書記則不能條悉古今揚雄不貧則不能作元言

殷之三仁皆暗于前而章于後何益于君何補于君
世有圍碁或言兵法之類上者張置疎遠多得道路
而勝中者務相遮絕爭便求利下者守邊隅趨作罍
自生于小地猶薛公之言黥布反也上計取吳楚廣
地道中計塞成臯遮要爭利下計據長沙以臨越守
邊隅趨作罍目者也更始將相不防衛罍中死棋皆
生也

文王葬枯骨無益衆庶衆庶悅之恩義動人也王翁
觀人五藏無損生人生人惡之殘酷也

案王翁謂王
莽以曾仕莽

不可斥名又不
可稱公故也

東方朔短辭薄語以謂信驗人皆謂朔大智後賢莫
之及譚曰人有以狐爲狸以瑟爲箜篌此非徒不知
瑟與狐又不知狸與箜篌乃非但言朔亦不知後賢